

# Roegga Ndaej Daih'it

上林县大丰镇云里小学三(1)班 Cinz Swingh/覃士晶

Ndaw ndoengfaex yaek guh beij gyaendei doxdax, gyoengq doenghduz faenfaen daenj hwnj buh ceiq gyaendei, daj seiq mienh bet fueng comz daeuj doxdax. Doxdax sikhaek bienq ndaej nauhyied dangqmaz.

Doxdax hainduj lo, roegyeng sien okciengz, de daenj buh vava loegloeg, daiq aen mauh moq ndeu, gyaendei dangqmaz. Ciepdkw roeg-gungjcoz okciengz, gij bwn de gak saek gak yiengh wenjmyabmyab, gyaendei dangqmaz.

Ceiq doeklaeng okciengz dwg roegga, de baez okciengz, gyoengq bouxyawj cungj riuha hwnjdaej. Aenvih de daengx ndang ndaemndet-ndet yakyawj dangqmaz.

Cingq youq seizneix, fag giemq raeu ndeu camx coh roeggungjcoz, seizneix roeggungjcoz lij maez youq

ndaw bouxyawj haenh de, lij mbouj dingz baij ok gij gyaendei de hawj daihgaya yawj.

Roegga yawjraen le haenqrengz hemq: "Vaiq! Vaiq! Vaiq ndojdeuz!" De itmienh haenqrengz hemq itmienh ganjgip coemj gvaqbae, yungh rengz nyoengx roeggungjcoz. Roeggungjcoz laemx roengz gwnz namh bae, danhseih de yawjraen faggiemq cingq camx youq gwnz ndang roegga seiz, de gamjdoengh dwk doiq roegga naeuz: "Docih mwngz! Danghnaeuz mwngz mbouj dingj gou dangj giemq ne, gou gaeng sieng lo!" Roegga ngunhngwd-ngwd naeuz: "Mbouj miz maz lo, vihliux baengzyoux, bouxlawz cungj baenzneix guh."

Gangj sat, roegga couh hoemj youq gwnz deih lo, yawjraen gijneix gyoengq doenghduz cungj comz



gyaqdaej yawj roegga.

Doeklaeng, bouxcaizbuenq duz-gaeng lwnh daihgaya, baez doxdax neix daih'it mingz dwg roegga. Duzgaeng lij son'gyauq gyoengq doenghduz: Maj

ndaej ndei yawj youqgaenj, danhseih simndei engq youqgaenj.

(bouxlauxsae son'gyauq: Lij Vwnzhaij/李文海)

## Gou Lujlaj Lai

Vahsug gangj ndaej ndei: "Mbouj miz boux lawz ndei caez." Raeuz bouxlawz cungj miz gezdenj, aen gezdenj ceiq hung gou dwg lujlaj. Cozyez mbouj daiq dauq ranz, ndangdaenj lumz daiq dauq, yenzbiz gaucat deng law bae, gijneix doiq gou daeuj gangj dwg saeh gingciengz miz, danhseih miz baez ndeu sawj gou lumz mbouj ndaej.

Duenh sujyay gou bae Nanzgingh camgya ginhsw yalingyingz. Ngoenz ndeu banringz, dou bae yenjbodingh yawj denyingj. Gou duet aenmauhbing coq bangxhenz, simmaez dangqmaz yawj denyingj, denyingj cuengq sat lo, sim gou vanzlij caem youq ndaw denyingj, dan dawz le aenboiraemx dauq, gingqyienz lumz dawz aenmauhbing lo. Ngamq okbae mbouj geijlai nanz, couh roxnyinh ngoenzneix daengngoenz coeg da lai, hix roxnyinh gwnz gyauej hoengqhangq, baez lumh, gag sup gaemz heiqliengz ndeu. Dai lo, aenmauh mbouj youq gwnz gyauej lo, haengjdingh deng law lo. Danhseih baenzlawz ra hix ra mbouj raen. "Neix baenzlawz guh ne? Gou haengjdingh deng bouxyaugvanh ndaq lo, mboujnex gou bae ndoj youq ba." Baenzneix ngeix le, gou caenhliengh gungj ndang youq, maqmuengh bouxwnq bang gou dangj aen'gyaeu hauej.

Danhseih gou aen'gyaeu hung baenz-neix bae, naeuz dangj couh dangj ndaej ha? Mbouj gvaq yaep ndeu couh deng boux-

gyaugvanh yawjraen lo. Bouxyaugvanh hawj duivuj dingz roengzdaej, byaij yamq hung daeuj coh gou, caemhcai haenq-sing cam naeuz: "Aenmauh mwngz ne?" Gou mbajbodbod naeuz: "Gou, mauh gou, ra mbouj raen lo." Bouxyaugvanh nyoq bwncaez, hat naeuz: "Aenmauhbing cungj deng law, mwngz lij daeuj neix guh maz?" Gou najmong dwk ngaem gyauej youq. "Haemh neix gvaq bangunghsiz gou daeuj!" "Ndei!" Gou saenzdaeddaed han naeuz.


Daengz banhaemh lo, gou sim diuq hwnj diuq roengz buet daengz aen-bangunghsiz bouxyaugvanh. Cij raen bouxyaugvanh cingq naengh youq giz-haenx caj gou, gwnz daiz coq miz aen mauhbing moqsemq ndeu. "Ne, hawj mwngz bw, sawq daenj yawj!" Gou baez daenj, hung iq cingq ngamj, gag cuengq gaemz hei q ndeu. Bouxyaugvanh naihsim doiq gou gangj: "Aen mauhbing yienjok gij viyiemz caeueq saeqnaeh bouxbing, dwg gij byauhci cunhyenz bouxbing, langhnaeuz mwngz mauhbing cungj deng law, vanzlij camgya gijmaz ginhsw yalingyingz ne?" Gou najmong dwk youh ngaem gyauej roengz-daeuj.

Aen sibgvenq nyauq lujlaj gou mbangj dwg saeh'iq, danhseih gou aeu yungjgamj doiq gij mbouj ndei gou, haenqrengz gaj de bae.

(Ginh Cinzno)



## Deihdoz



Mbaw dozveh beixmbauq nem youq gwnz ciengz de, gou guhlawz cungj yawj mbouj rox ne.

"Gwnzde veh gijmaz ne?" Gou cam beixmbauq naeuz.

Beixmbauq riu gou: "Mwngz huk lai, deihdoz goj mbouj rox, dwg deihdoz Cungguk goj."

"Vihmaz heuh deihdoz Cungguk ne?" Gou mbouj rox lo.

Beixmbauq youh riu gou naeuz: "Mwngz huk dahraix! Cungguk raeuz gizgiz cungj veh youq gwnz neix, yienghneix couh heuhguh deihdoz Cungguk lovei."

"Biengz raeuz gizneix, ranz raeuz veh youq gizlawz ne?"

Beixmbauq youh riu gou naeuz: "Caen dwg daeghukiq dahraix! Gaej naeuz aen lueg iq baihraez mbouj miz mingz neix, couhsuenq dwg aen cin beix doegsaw de, cungj mbouj veh hwnjbae bw."

"Beix mbouj dwg naeuz Cungguk raeuz gizgiz cungj veh hwnjbae luma?" Gou lij caengz rox dem.

"Daeghuk! Daeghuk!" Beixmbauq riu gou huk, mbouj han gou, hoeng de couh son gou yawj deihdoz, naeuz baihgvas deihdoz dwg baihdoeng, baihsuix dwg baihsae. De vix baihgvas deihdoz naeuz: "Baihneix dwg baihdoeng....."

"Aiya, beix ha, beix huk lai lo. Beix youq hagdangz guhlawz hag ne?" Mbouj caj beixmbauq gangj sat, gou couh raen ndeiri. Beixmbauq naeuz baihgvas deihdoz dwg baihdoeng, baihgvas mbouj dwg baihsae ma? Gou vix aen bakdangq baihgvas deihdoz de, daj bakdangq dinglingz yawjraen daengngoenz doekcong: "Bohmeh naeuz gvaq, daengngoenz dwg daj baihdoeng okdaej, daj baihsae doekcong. Bouxboux cungj rox aen dauhleix neix, doenghgiy lwnyez iq gvaq gou de cungj rox bw."

Hoeng beixmbauq riu gou dem: "Caen dwg daeghuk dahraix!"

(Daj 《Bonsei Sim Lwngyeu》 (Veiz Gizlinz raiz) senj okdaej, Lwgfwnzmeih/卢奋长 hoiz)